

Kalaallit Nunaanni meeqqat pillugit inatsisip Kalaallit Nunaannut atuutilersinnissaanut peqqussutissatut missingiummut aamma meeqqat pilersorneqarnerat il. il. pillugu inatsisip Kalaallit Nunaannut atuutilersinnissaanut peqqussutissatut missingiummut Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Saqqummiussissut

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Angajoqqaanit katissimasunit imaluunniit angajoqqaanit katisimanngitsunik inunngorsimaneq qangaanerusoq pingaaruteqarsimavoq. Meeraq angajoqqaanit katissimasunit inunngorsimappat taava "meeravittut" taaneqassaaq. Akerlianilli anaanamit kisermaamit imaluunniit angajoqqaanik aappariinnit katisimanngitsunik inunngorsimagaanni taava "uersagaasimassaaq". Tamanna inooqataanikkut naligiinnginnermik kinguneqartitsivoq, tassa meeqqat uersagaasimasut ajornerusumik inissisimmamata. Kina ataatarinerlugu ilisimanissaanut pisinnaatitaaffeqanngillat, imaluunniit inatsisitigut akuerineqarsinnaanatik.

Qujanartumillu ullumikkut ima inissisimavugut inuiaqatigiit ineriartorsimalluta, silatunerulersimallutalu. Inatsisitigut ataataqanngitsut ataataassuseq pillugu suliamik aallartitsisinnaalersimapput taamanikkullu aalajangerneqarsimanngitsoq ataataassuseq akueritillugu. Tamatumali saniatigut meeqqanut inatsit 1962-imeersuusoq allanngortinneqarpiarsimangilaq. Nunatta ineriartorneranik malinnaasinnaasumik, naligiissitaanermik pitsaanerulersitsisumik aamma angajoqqaanngorlaat pisinnaatitaaffiinik pitsaanerulersitsisumik inatsimmik nutaamik atorfissaqartitsivugut.

Meeqqatta siunissaannut tamatta ataatsimoorluta akisussaavugut. Meeqqatta pitsaanerpaamik inuunermi atugassaqartinnissaat, meeqqamut pitsaanerpaaq malillugu inuiaqatigiinnut inatsimmullu naleqqussarnissaa akisussaaffigaarput. Meeraq isumassorneqarluni, asaneqarluni ataatsimoorfiusumilu peroriartusaaq. Inatsisip allanngortinneratigut taamaallaat meeqqamut isumalluuteqarluartumut aqqutissiuinnaavugut, meeqqamik nalitsinni ineriartornermik nutarterinermillu inissaqartitsilersumik.

Inuiaqatigiiusugut inissaqartitsinerulersimavugut, ima inissaqartitsilersimalluta ullumikkut ilaqutareeriaatsinut assigiinngitsorpassuarnut inissaqartitsilluta. Meeqqanut inatsimmut peqqussummi matumani aamma arnat arnaqatiminnik atoqateqartartut anaanaaqataasutut nalunaarsugaalersinnaapput.

Ataataasinnaasutut aamma ataataassuseq pillugu suliap aallartinnissaanut pitsaanerusumik periarfissaqalerpoq. Ullumikkut anaanaasup katisimanngitsup kina ataataanersoq eqqaasariaqanngilaa, taavalu ataataasoq qanoq iliorsinnaanani. Nutaaliornertut

ataataasinnaasoq ataataassuseq pillugu suliamik nammineq aallartitsinissamut periarfissaqarluarnerulissaaq.

Anaananut, ataatanut, meeqqamut ilaqtariinnullu tamarmiusunut pitsaanerpaamik atugassaqtitsinissarput uannut pingaarpoq. Peqqussummi matumani ataataassutsip akuerineqarnissaa ajornannginnerulissaaq, aamma erninissaq sioqqullugu. Anaananngorlaatut ilaqtariittullu meeqqap inunngorlaap alutorsaatiginissaa ilisarimalernissaalu taamaallaat sammisariaqarpaat, inatsisitigut allaffissorneq eqqarsaatiginagu.

Taamaattumik aalajangiiffigisassatut siunnersuut manna Naalackersuisut sinnerlugit saqqummiussinnaagakku nuannaarutigaaara tulluusimaarutigalugulu. Naalackersuisut taamatut oqaaseqarlutik immikkoortoq Inatsisartunut oqaluuserisassanngortippaat.